

Inuiaqatigiit nunatsinni tarnikkut peqqinnerulernissaannik siunertaqarluni periusissiamik UPA2027-mut Naalakkersuisut suliaqaqqullugit peqquneqarnissaannik Inatsisartut aalajangiiffissaattut siunnersuut. Periusissiaq UPA2027-mi saqqummiunneqassaaq.

(Inatsisartunut ilaasortaq, Nivi Rosing, Inuit Ataqtigiit)

Akissuteqaat

(Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneqarnera

Inatsisartunut ilaasortamut, Nivi Rosing-imut, Inuit Ataqtigiit, inuiaqatigiinnut pingaaruteqartorujussuarmik siunnersuuteqarsimaneranut Naalakkersuisut qujapput.

Naalakkersuisut siunnersuuteqartup tunngavilersuutai isumaqatigaat, tassani ukiuni amerlasuuni inuiaqatigiinni ajornartorsiutinik aaqqiinissamut suliniutit assigiinngitsut aallartinneqartarsimasut, taakkulu suli ingerlanneqartut. Imminut toquttarnerit aamma imminut toqunnissamut eqqarsaatit kisiat pineqanngillat, aammali ulluinnarni tarnikkut atugarissaarnermut, innuttaasut inuunerisa pitsaassusaanut pingaaruteqartumut tunngalluni. Taamaattumik Naalakkersuisut siunnersuuteqartup ernumassutai paasilluarpaat aammalu suli ukkatarinninnissaq pisariaqartoq akuersaarlugu.

Ajornartorsiutit tikkuarneqartut annertuupput pisariullutillu. Taamaattumik aamma pingaaruteqarpoq suliniutit ilisimasatigut tunngavissaqarluartumik aammalu suut iluaqutaanersut ersarissumik paasinninnermit tunngaveqarnissaat. Naalakkersuisut naliliipput suliniutit pingaarutillit suliassaqarfimmi aallartinneqareersimasut, ilaatigut imminut toqunermik pinaveersaartitsinermit periusissiaq *Qamani* aammalu inuit peqqissuunissaannut pilersaarut *Inuuneritta III*, tassani tarnikkut peqqissuuneq, atugarissaarneq aammalu nakuusernermik pinaveersaartitsineq qitiutinneqarlutik. Suliniutit taakku ilisimasanik pioreersunik aammalu misissuinerit tunngavigalugit ineriartortitaapput, sulilu atuullutik.

Tamatumunnga atatillugu erseqqissaatigineqarsinnaavoq, periusissiaq *Qamani* ikiorsiullugu qaammarisaanikkut, siusissukkut iliuuseqarnikkut najukkanilu iliuuserisinnaasanik annertusaanikkut innuttaasut aarlerinartumi inissimasut siusinnerusukkut naapinneqarsinnaasut pitsaanerumillu tapersersorneqarlutik. Inuuneritta III suliniutinik imaqarpoq, tassani eqqarsartaatsikkut peqqissuseq, atugarissaarneq, nakuusernermik pitsaaliuineq aamma peqqinnartumik ataatsimoornernik nukittorsaanerit qitiutinneqarput. Tamatuma saniatigut suli atualinngitsunut suliassaqarfimmut periusissiami Meeraaneq Nalitoq-mi meeqqat atugarissaarnerat, peroriartornermi atugassarititaasut toqqissisimanartut aamma siusissukkut iliuuseqarneq qitiutinneqarput, taaneqartut piffissaq ungasinnerusoq eqqarsaatigalugu eqqarsartaatsikkut peqqissusermut isumalerujussuurtut aamma nalilerneqarsipput

Naalakkersuisut pingaaruteqartippaat suliniutit akuersissutigineqareersut aalajaatumik aammalu ataavartumik atuutilersinneqarnissaat ukkatarineqassasoq. Peqatigisaanillu aalajangiisuullunarpooq suliniutit akuersissutigineqareersut siunertamut naapertuuttuunersut,

aammalu iluarsiiisuteqartoqassanersoq, imaluunniit nutaanik suliniuteqartoqassanersoq ingerlaavartumik nalilersuisarnissaq. Siunissami eqqortumik aalajangiisassagutta periusissiat aammalu pilersaarutit pioreersut siulliullugit nalilersorneqartarnissaat pisariaqarpoq.

Anigoruminaatsunik nalaataqarsimaneq taakkulu kingunerluutai pillugit sulineq innuttaasut tarnikkut peqqissuunissaannut ataatsimut suliniuteqarnerup pingaaruteqarnerujussuisa ilagaat. Taamatut isiginninneq maanna suliniutini eqqarsaatigineqareerpoq, ilaatigut Inulerivik pilersinneqarneratigut aammalu Tusaannga ulloq unnuarlu ammasarnissaanik qulakkeerinninnikkut. Neqeroorutit taakku innuttaasut atugarissaarnissaannik nukittorsaanermik sulinermi sulii pingaarutilittut inissisimassapput.

Taakku tunuliaqutaralugit Naalakkersuisut allannguutissatut siunnersuut imaattoq saqqummiuppaat:

”Qamani aammalu Inuuneritta III pillugit nalilersuisoqarnissaanut Inatsisartut aalajangiiffigisassaattut siunnersuut. Nalilersuinerit taakku tunngavigalugit Naalakkersuisut kingorna naliliissapput innuttaasut tarnikkut peqqissusaasa aammalu atugarissaarnissaasa nukittorsarneqarnissaanut suliniutit suut aallartinneqassanersut. Nalilersuineq UKA2027-mi piareersimassaaq.”